

13/05/2000

Masalah parti tanggungjawab semua

AHLI Umno tidak seharusnya meletakkan semua tanggungjawab menyelesaikan masalah dalaman parti kepada Presidennya, Datuk Seri Dr Mahathir Mohamad saja tanpa memberikan sebarang sokongan.

Ahli Majlis Tertinggi (MT), Datuk Azmi Khalid berkata, selama ini kebanyakan pemimpin bawahan menyerah semua perkara berkaitan parti kepada Dr Mahathir, sedangkan banyak perkara lain membabitkan negara yang beliau harus dilakukan.

Katanya, dalam hal ini bukan saja ahli MT harus memikirkan masa depan Umno, malah ketua bahagian dan pemimpin peringkat cawangan juga wajar memainkan fungsi mereka.

"Seringkali hanya Presiden yang memperjuangkan sesuatu, termasuk menyelesaikan isu dalaman parti.

"Saya percaya, jika semua pihak sedar diri mereka sudah memainkan fungsi sewajarnya, tidak ada sebab timbul begitu banyak masalah dalam Umno seperti yang kita dengar daripada perwakilan dari seluruh negara pada perhimpunan agong Umno kali ini," katanya.

Mengenai kekurangan sokongan pihak swasta terhadap Umno, Azmi yang juga Menteri Pembangunan Luar Bandar berkata, sudah tiba masanya Umno mengorak langkah memikirkan apa yang harus dilakukan bagi mengatasi masalah yang timbul.

(END)